

Cuira, ils 23 da settember 2018

Communicaziun a las medias

NA a l'iniziativa da linguas estras La Lia Rumantscha e la Pro Grigioni Italiano èn satisfatgas

La Lia Rumantscha (LR) e la Pro Grigioni Italiano (Pgi) èn cuntentas cun la decisiun da las Grischunas e dals Grischuns da refusar l'iniziativa da linguas estras. Il resultat valiteschan ellas cunzunt sco mussament da solidaritad tranter las cuminanzas linguisticas en il Grischun.

Sco uniun tetgala rumantscha resp. taliana èn la LR e la Pgi levgiadas che la gronda maioritad da las Grischunas e dals Grischuns han vuschà cunter l'iniziativa dal pievel «Mo ina lingua estra en scola primara (iniziativa da linguas estras)». En il chantun Grischun triling vegnan er en l'avegnir instruidas duas linguas estras en scola primara. Quai vegn dabun al spiert da cuminanza chantunal ed è in mussament da solidaritad tranter la populaziun tudestga, rumantscha e taliana.

Cun questa votaziun speran la LR e la Pgi che la discussiun davart il dumber da linguas estras en scola primara saja terminada, uschia ch'ins po ussa sa concentrar sin autras dumondas impurtantas en connex cun la scola da l'avegnir.

Il resultat da la votaziun oblighescha tant las uniuns tetgalas sco era la regenza e las scolas da prender serius la malcontentientscha d'insaquants geniturs e da differentas persunas d'instrucziun e da s'engaschar cun anc dapli energia per promover la sensibilitad per la trilinguitad grischuna. La debatta avant la votaziun ha mussà cleramain quant necessari ch'igl è da meglierar l'instrucziun da segundas linguas.

La LR e la Pgi engrazian a tut quels che han sustegnì la campagna cunter l'iniziativa da linguas estras.

Johannes Flury, president LR – Franco Milani, president Pgi